

四庫全書

史部

# 欽定四庫全書

史部

欽定皇興西域圖志卷十九

詳校官通政使<sub>臣</sub>夢吉

檢討<sub>臣</sub>德生覆勘

總校官候補中允<sub>臣</sub>王燕緒

校對官中書<sub>臣</sub>吳樹萱

謄錄監生<sub>臣</sub>褚兆麟

欽定四庫全書

欽定皇輿西域圖志卷九目錄

疆域二

安西北路一

哈密屬

哈密

蘇木哈喇亥

阿斯塔納

托郭棲

拉布楚喀

哈喇都伯

賽巴什達里雅

格子烟墩

星星峽

多都摩垓

德都摩垓

塔勒納沁

半池泉

柳樹泉

博羅圖阿滿

察罕和羅海

內勒滾

阿薩爾圖

伊里克庫木

察克瑪克塔什

額什墨

鎮西府屬

鎮西府治

宜禾縣治

鏡兒泉

木城

三塘

石人子

奎蘇

松樹塘

沙山子

呼濟爾台

圖古里克

哈喇和屯

度濟

庫爾墨圖

西里克拜牲

噶順

奇臺縣治

濟爾瑪台

木壘

伊勒巴爾和碩

阿克塔斯

烏蘭烏蘇



格根

吉布庫

鏗格爾

古城

都爾伯勒津

乾溝

蘇博阿拉

阿濟

必濟

華烏里雅蘇台

察罕察奇爾圖

阿拉克椿集

奎屯郭勒圖

蘇魯圖

色爾克

哈布塔克

拜塔克

欽定皇輿西域圖志卷九目錄

欽定四庫全書

欽定皇輿西域圖志卷九

疆域二

安西北路一

哈密屬 東至塔勒納沁接喀爾喀界西至哈喇都  
伯通天山南路闢展屬界西南至半池泉星星峽  
博羅圖阿璫接安西南路安西州界南至沙磧北  
至天山接鎮西府界

哈密

哈密在安西州城西北八百七十里距京師七千一百八十里城二其舊城周四里東北二門康熙五十六年建城東有水西南流新城雍正五年建周里許東西北三門為官兵駐防之所東闌干水西賽巴什湖夾流十餘里匯於新城之南曰南湖二城皆北倚大山三面平曠所居回民以耕牧射獵為生田疇沃衍園林蕃廡氣候溫暖泉甘土肥

山泉競發巨細不一伏流或數十里或百里許出地引渠溉田城外東西兩關地當孔道商民輻輳號稱殷庶其地於漢屬匈奴號伊吾盧後漢時始內附為伊吾魏入蠕蠕隋置伊吾郡旋屬突厥唐置西伊州改伊州五代時號胡盧磧宋入回鶻元為威武王分鎮之所明設哈密衛後入土爾番

本朝康熙三十五年回首額貝都勒拉遣貢駝馬及刀三十六年額貝都勒拉遣子郭帕伯克擒噶勒

丹子色布騰巴勒珠爾來獻其地始內屬

後漢書西域傳永平十六年明帝命將帥北征匈奴取伊吾廬地遂通西域章帝二年匈奴遣兵守伊吾地和帝永元元年大將軍竇憲破匈奴二年憲遣副校尉閼槃掩擊伊吾破之安帝元初六年遣行長史索班將千餘人屯伊吾以招撫之於是車師前王及鄯善王來降自敦煌西出玉門陽關涉鄯善北通伊吾千餘里伊吾地宜五穀桑麻蒲



荀漢常與匈奴爭車師伊吾以制西域

魏書高昌傳太和五年高昌立馬儒為王二十一年表求內徙高祖納之遣韓安保赴之割伊吾五百里以儒居之蠕蠕傳其西則焉耆之地東則朝鮮之地北則渡沙漠南則臨大磧其常所會庭則敦煌張掖之北小國皆苦其寇抄羈摩附之

隋書薛世雄傳世雄為玉門道行軍大將與突厥啟民可汗連兵擊伊吾師次玉門啟民可汗不至

世雄孤軍渡磧伊吾初謂隋軍不能至皆不設備  
及聞世雄兵已渡磧大懼請降世雄遂於漢舊伊  
吾城東築城號新伊吾留銀青光祿大夫王威以  
甲卒千餘人戍之而還西突厥傳東拒都斤西越  
金山龜茲鐵勒伊吾悉附之

元和志古伊州貞觀四年內附於其地置伊州州  
境東西一千一十五里南北四百九十里西南至  
西州七百三十里東南取莫賀磧路至瓜州九百

里正南微東至沙州七百里領縣三伊吾納職柔  
遠

唐書地理志伊州伊吾郡本西伊州貞觀六年更  
名伊吾貞觀四年置并置柔遠縣神功元年省入  
焉在大磧外南去玉門關八百里

五代史高居誨記沙州西曰仲雲其牙帳居胡盧  
磧云仲雲者小月支之遺種也吾盧磧漢明帝時  
征匈奴屯田於吾盧蓋其地也地無水而常寒多

雪每天暖雪消乃得水匡鄴等西行入仲雲界至  
大屯城

宋史高昌傳王延德使高昌歷伊州州將陳氏其  
先自唐開元二年領州凡數十世唐時詔勅尚在  
次歷益都次歷納職城在大患鬼魅磧之東南望  
玉門關甚近

明史哈密傳洪武中太祖定輝和爾

舊作畏兀兒今改正

地

漸逼哈密昂克特穆爾

舊作安克帖木兒今改正

遣使朝貢永

樂二年封忠順王四年立哈密衛八年封托里特

穆爾

舊作免力帖木兒今改正

為忠義王宣德元年命布達錫

里

舊作卜答失里今改正

嗣忠順王自是二王並貢其地北

衛拉特

舊作瓦剌今改正

西土爾番

舊作吐魯番今改正

東沙州罕

東赤金諸衛衛拉特酋額森

舊作也先今改正

兵圍哈密

取王母北還天順四年王卒母努溫答失里主國

事七年北酋寄寄肅蘭

舊作訛加思蘭今改正

破其城王母

走苦峪朝廷不能援成化二年擢巴圖穆爾

舊作把塔

木兒今改正

為右都督攝國事八年子哈森

舊作罕慎今改正

嗣職土爾番襲破其城十年命罕慎權主國事築

苦峪城移哈密衛於其地十八年罕慎襲破哈密

還居故土弘治元年封忠順王土爾番阿哈麻

舊作

阿黑麻今改正

誘殺之據其地二年都指揮阿穆呼朗

舊作

阿木郎今改正

襲破之五年立善巴

舊作陝巴今改正

為忠順王

六年阿哈麻襲哈密執善巴禽阿穆呼朗支解之

七年廷臣請令都督昂克波賴

舊作奄克字刺今改正

總理

哈密且修苦峪城凡番人散處甘涼者令悉還其

地後諸番以朝廷閉關絕貢不得入咸怨阿哈麻

乃歸善巴仍其舊封自是哈密復安十八年封善

巴子巴雅濟

舊作拜牙即今改正

為忠順王正德八年叛入

土爾番莽肅爾

舊作滿肅兒今改正

遣和卓塔濟丁

舊作火者他只

丁今改正

據哈密十二年莽肅爾移居之分兵據沙州

入寇後復入貢而王迄不還自是置哈密不問後

為沙巴達

舊作失拜烟答今改正

子彌爾瑪哈穆

舊作迷兒馬黑麻今

正改

所有服屬土爾番猶比歲一貢迄隆慶萬厯間  
不絕然非忠順王苗裔矣

按徼外山川部落名號代殊依類推求務詳厥  
始伏讀

御製哈薩克使臣至今隨圍獵詩跋云史稱大宛東則  
扞采于闐扞采音韻與今之哈密為近或又以為哈  
密為古伊吾引歷代開田屯兵建設州縣為據然焉  
知非漢占伊吾之地屯田設戍而扞采乃西遷近于



聞而居乎又安知非中國浸微而扞采仍來其故處乎

臣等紬繹

聖訓考証史書前漢書載陽關西一千六百里至鄯善又西七百里至且末又西二千里至精絕又西四百六十里至扞采又西三百九十里至于闐是前漢時之扞采固在陽關以西四千七百里外其時尚未取伊吾盧地也惟是伊吾與哈密音不相類意扞采國人嘗居此因轉扞采為哈密如和闐

之為古于闐理或然也其扞罽國遷徙之蹟雖不可考要之哈密為扞罽轉音則較然不誣嘗推而論之漢車師前部高昌壁今闐展地在哈密西八百里後漢書稱伊吾北通車師前部二千二百里方隅道里似不相合然考明帝取伊吾盧地遂通西域于闐諸國知漢時伊吾東西境甚廣今自闐展南踰大磧更南行當玉門陽關之西與漢鄯善國地南北相直班志謂涉鄯善北通伊吾自伊吾

北通車師者其南北亦相直知當日鄯善北車  
師南尚屬伊吾西境隋薛世雄渡大磧而築城  
留戍其境亦在高昌南也若魏高祖欲以伊吾  
五百里地封高昌王去高昌四百里迎韓安保  
而安保不至還伊吾所謂五百里伊吾地在高  
昌東南四百里外可知今自哈密西行至闐展  
適在四百里外而自哈密西南行至博羅圖阿  
瑞敦煌縣交界四百餘里至星星峽蘆岡泉與

安西州本境交界五百餘里應即當時欲封高昌王地蓋今哈密止兼有唐時伊州屬之伊吾柔遠兩縣地而所謂納職縣者應在今安西州西境外地與漢時伊吾盧故地無涉

蘇木哈喇垓

蘇木哈喇垓亦名頭堡東距哈密城六十里其東南境村庄凡五泉二十五處

魏書帝紀

太和十二年蠕蠕伊吾戍主高羔子以

城內附

唐書西域傳伊吾城者漢宜禾都尉所治商胡雜居隋末內屬置伊吾郡天下亂復臣突厥貞觀四

年城酋來朝頡利滅舉七城降列其地為西伊州

明史哈密傳成化十八年哈密右都督哈森夜襲

哈密城破之雅蘭

舊作牙蘭  
今改正

遁走乘勢連復八城

遂還居故土

按唐書載伊吾七城明史載哈密八城今哈密

西境凡五堡得五城其東境亦多回民聚處七  
城八城之舊大槩可見至建置之始在漢築有  
伊吾城魏高羔子以城內附隋薛世雄於漢伊  
吾城東築城號新伊吾與今新舊諸城方位異  
同則未宜強附耳

阿斯塔納

阿斯塔納亦名二堡在蘇木哈喇垓西二十里東  
距哈密城八十里境有村庄凡三泉二十三處

托郭樓

托郭樓亦名三堡在阿斯塔納西北四十里東距  
哈密城一百二十里境有村庄凡五泉十三處最  
著者白楊溝柳樹泉二水南流數里乃合

拉布楚喀

拉布楚喀亦名五堡在托郭樓西南二十里東距  
哈密城一百四十里境有村庄凡十三泉九處小  
河一道

哈喇都伯

哈喇都伯亦名四堡在拉布楚喀西二十里東距  
哈密城一百六十里境有村庄凡二十三泉八處  
迤北二十里有大泉流水成渠

賽巴什達里雅

互見  
水

賽巴什達里雅在哈密城東北二十里地以湖名

其東北境為牛毛湖兩湖左右皆有屯田

見屯  
此門

格子烟墩



格子烟墩在哈密城東南二百十五里自城東南行七十里為西黃蘆岡又東行七十五里為西長流水又東南行七十里至此

按元和志柔遠縣西北至伊州二百四十里古人計地自某縣至某縣皆據地中以起數不指邊境而言則所謂二百四十里者由柔遠縣城至伊州州城之數也今格子烟墩北至哈密城二百十五里以古今丈尺計之則柔遠故城當

在於是

星星峽

互見山

星星峽地以峽名在格子烟墩東南二百八十里西北距哈密城四百九十里自格子烟墩東南行一百五十里為苦水又東南行八十里為沙泉子又東南行五十里至此為哈密東南境接安西州界雍正十三年征準噶爾出師於此修塗轉餉有民人楊可祿修路碣記

北魏蠕蠕傳其常所會庭則敦煌張掖之北

元和志柔遠縣西北至伊州二百四十里縣東有柔遠故鎮因以為名

楊可祿修路碣記

皇威震疊底定西酋整厥虎旅駐於伊州啟拓疆宇騰聲遐陬輓轡飛挽駕馬服牛地靈取順荒磧泉流惟山磊砢輪蹄是憂聿來善民攘剔平修王道坦蕩振古長留

按北魏蠕蠕邊界西抵焉耆南臨大磧而常所  
會庭在敦煌之北當焉耆大磧東南境今自星  
星峽半池泉博羅圖阿瑞迤西北分道以達於  
哈密皆其地也今之哈密唐為伊吾縣在伊州  
郭下柔遠縣在伊州東南今自星星峽至哈密  
屬東南境當在唐柔遠縣地

多都摩垓

多都摩垓在哈密城東二百十里東西皆有泉源

出天山北麓夾流過多都摩垓北合流百餘里瀦  
為大澤

德都摩垓

德都摩垓在多都摩垓東北七十里西南距哈密  
城二百八十里東西皆有泉即塔勒納沁河之北  
流也為哈密東北境自德都摩垓西北行一百二  
十里至圖古里克接鎮西府界又自哈密城北八  
十里至黑帳房又北二十里為長山子又北二十

里為南山口是為哈密北境接鎮西府松樹塘界  
塔勒納沁

塔勒納沁在哈密城東北二百二十里土城一有

屯田

見屯  
政門

半池泉

半池泉地以泉名在塔勒納沁東南二百五十里  
自塔勒納沁東南行五十里為沙泉子又東南五  
十里為瑣瑣阿卜又東南一百五十里至此為哈

密東南境接安西州界

按自半池泉至塔勒納沁屬哈密東南境以元和志柔遠縣西北至伊州二百四十里之文考之蓋亦柔遠縣地

### 柳樹泉

柳樹泉地以水名在哈密城南六十里踰河而至其東南六十里為哈什泉又一百三十里為酤水又八十里為大泉一帶山泉饒裕

博羅圖阿瑞

博羅圖阿瑞在哈密東南四百里經柳樹泉哈什泉酤水大泉至此為哈密東南境接安西州屬敦煌縣北界

按古伊州所屬伊吾柔遠二縣伊吾居柔遠之西今自安西州北至哈密之道偏東屬柔遠縣故地則自敦煌縣北之青墩峽出博羅圖阿瑞由柳樹泉至哈密之道偏西應屬伊吾縣故地



也

又按舊一統志載自安西鎮抵哈密分二道一  
由安西鎮為東道一由沙州為西道後因安西  
鎮為往來總匯始專行東道即今由得勝墩經  
格子烟墩至哈密之路乾隆二十七年移設安  
西府於敦煌專行沙州之西道三十二年仍改  
由東道云

以上屬哈密

察罕和羅海

察罕和羅海在哈喇都伯城西七十里哈密西境  
外南臨大磧

內勒滾

內勒滾在察罕和羅海西七十里地多碎石有水  
草南臨大磧

阿薩爾圖

阿薩爾圖在內勒滾西六十里南有澤名沙拉淖

爾又南臨大磧

伊里克庫木

伊里克庫木在阿薩爾圖西六十里地無水草南  
臨大磧

察克瑪克塔什

察克瑪克塔什在伊里克庫木西六十里地無水  
草南臨大磧

額什墨

卷九  
額什墨在察克瑪克塔什西五十里南臨大磧又  
西一百五十里至洪入闢展界自伊里克庫木以  
西皆沙磧至此則沙磧之內微有水草云

按自察罕和羅海至此南境皆臨大磧今考唐  
書吐蕃傳吐蕃長鼓右驅踰高昌歷車師鈔常  
樂絕莫賀延磧以臨敦煌又河源東北直莫賀  
延磧尾殆五百里磧廣五十里北自沙州西南  
入吐谷渾寔狹故號磧尾西域傳自隋亂磧路

閉故西域朝貢者皆道高昌突騎支請開大磧  
道以便行人又宋王延德高昌行紀歷伊州次  
歷益都次歷納職城在大患鬼魅磧之東南無  
水草載糧以行凡三日息鬼谷口避風驛凡八  
日至驛田寺次歷地名寶莊又歷六鍾乃至高  
昌據此則察罕和羅海至額什墨以南之大磧  
當屬唐之莫賀延磧高昌王突騎支請開以便  
行人者在宋則為大患鬼魅磧也

以上屬哈密境外地

鎮西府

即巴爾庫勒

屬

統縣二宜禾奇臺東至圖古里

克接喀爾喀界西至乾溝接迪化州阜康縣界南至天山踰山接哈密界北至哈布塔克接天山北路界

鎮西府治

鎮西府治在巴爾庫勒東南距哈密三百三十里距京師七千五百十里南界天山西隱平岡西北

有巴爾庫勒淖爾周一百二十餘里緣山北麓原  
泉競發分為三河匯入大澤水氣浸潤庶草繁廡  
地宜畜牧居天山之陰氣候多寒

本朝康熙五十四年內屬雍正九年築巴爾庫勒城  
周八里高二丈東西南北四門初以安西同知駐  
防其地乾隆三十八年置鎮西府以巴爾庫勒城  
為府治城內有

萬壽宮

文廟城隍廟城西南有龍王廟城東有城周六里為  
滿洲兵弁駐防之所亦建

萬壽宮

關帝廟城西北三里別建

關帝廟廟前有漢敦煌太守裴岑碑

漢敦煌太守裴岑祠碑文維漢永和二年八月敦

煌太守雲中裴岑將郡卒五千人誅呼衍王壽斬  
馘部衆克敵全師除西域之灰燭四郡之害邊境



又安振威到此立德祠以表萬世

漢書武帝紀貳師將軍與右賢王戰于天山注云  
近蒲類國西域傳匈奴東蒲類王茲力支將人衆  
千七百餘人降都護都護分車師後王之西為烏  
貪訾離地以居之

按鎮西府於前漢為匈奴東蒲類王茲力支地  
後漢屬伊吾盧地後魏屬蠕蠕隋屬伊吾郡後  
入突厥唐屬伊州伊吾縣明屬衛拉特

舊作瓦  
刺今改

正

此前代沿革大略也至漢時蒲類部落不一其王名茲力支者為東蒲類國故曰匈奴東蒲類王也其治天山西疏榆谷者在卑陸且彌諸國之西為西蒲類國故西域傳蒲類國治天山西也又據後漢書西域傳蒲類本大國其王得罪單于徙蒲類人六千餘口內之匈奴右部阿惡地右部當居西鄙則其國本在東陲可知惟其得罪單于是以西降都護既降之後居烏貪

訾離地在今闢展西北未降之前所謂東蒲類  
者當在今闢展之東應屬今鎮西府境更以後  
漢書班超傳注蒲類海在敦煌北之文証之又  
當在敦煌之北則今之巴爾庫勒淖爾即漢蒲  
類海今之鎮西府即漢東蒲類茲力支故地也  
至漢永和碑為後漢明帝之十有二年史傳不  
著其事疑當時敦煌郡人為裴岑建祠而立後  
乃改祠為廟耳

宜禾縣治

宜禾縣乾隆三十八年設與鎮西府同治東南至  
南山口二百五十里東北至鹽池百六十里西至  
噶順三百四十里南至大山十里北至三塘一百  
六十里自縣治東北行五十里歷五墩至屯田處

地名朴城子有四庄

見屯  
政門

鏡兒泉

鏡兒泉在宜禾縣治西北六十里自縣治西北行

五十里歷五墩又十里至其地自鏡兒泉折而西南行二十里至三個墩又西南行繞巴勒庫爾之西五十里為肋巴泉

### 木城

木城在宜禾縣治北九十里西南境有石城子自鏡兒泉東北二十里至石城子又東十里至其地

### 三塘

三塘在木城北七十里南距宜禾縣治一百六十

里自木城東北行二十里至柵門口踰山五十里至其地

石人子

石人子在宜禾縣治東五十里自縣治東歷固原堡大泉至其地其西南境有東黑溝

奎蘇

奎蘇在石人子東四十里西距宜禾縣治九十里當巴爾庫勒淖爾發源處左右兩流之間

松樹塘

松樹塘蒙古語名招摩多在奎蘇東南九十里西距宜禾縣治一百六十里是為縣東南境南踰庫舍圖達巴至南山口接哈密界

沙山子

沙山子在石人子東北八十里踰巴爾庫勒淖爾三河源至其地

呼濟爾台

呼濟爾台在沙山子東二十里西南距宜禾縣治一百五十里其東南踰山十里有鹽池

唐書地理志伊州伊吾縣南二里有鹽池

元和志陸鹽池在伊州南六十里周迴十餘里無魚水自生如海鹽月滿則鹽多而甘月虧則鹽少而苦

按唐書及元和志俱載鹽池在伊吾縣南若以宜禾縣東北境之鹽池當之方位不合而舍此



無所謂鹽池者疑唐時縣治尚在今鹽池北境  
說詳後哈喇和屯條

圖古里克

圖古里克在呼濟爾台東一百四十里西距宜禾  
縣治二百九十里又東南行一百二十里至多都  
摩垓接哈密界

哈喇和屯

哈喇和屯在圖古里克北三十里

按唐伊州伊吾縣故城基址史無明文以元和志新唐書伊吾縣南有陸鹽池及鹽池海之說推之是當時縣治在鹽池北也若以今哈密城鎮西府城當之則鹽池在城東北不在城南而今哈喇和屯則適居鹽池之北疑屬唐時伊吾縣故城也蓋歷代置立州縣治所不必一處疑漢伊吾舊城隋伊吾新城皆在今哈密至唐景龍四年於伊州西北三百里置伊吾軍乃移建

縣治於此今之哈喇和屯殆即其遺址故南有  
鹽池形勢相合耳

度濟

度濟在宜禾縣治西九十里北有小山東曰尖山  
子西曰獨山子又自獨山子西南六十里至托來  
達巴

庫爾墨圖

庫爾墨圖在度濟西三十里東距宜禾縣治一百

二十里又西六十里為巴肋泉塘哈畢爾噶布拉  
克出其地

西里克拜牲

西里克拜牲在庫爾墨圖西北一百十里東南距  
宜禾縣治二百三十里西有烏爾圖水塘烏爾圖  
布拉克出其地

元和志伊吾軍在伊州西北三百里折羅漫山北

甘露川置刺史為使景龍四年置

按庫爾墨圖西里克拜牲皆在鎮西府西北境  
與元和志載伊吾軍去伊州道里相近哈畢爾  
噶布拉克烏爾圖布拉克在其左右或即甘露  
川之遺蹟歟

### 噶順

噶順在西里克拜牲西南一百里東北距宜禾縣  
治二百七十里有泉出山下南流其北四十里為  
鄂籠吉有舊城噶順西接奇臺縣界

以上屬宜禾縣

奇臺縣治

奇臺縣治東距府治六百九十里縣治東至噶順溝三百七十里接宜禾縣界西至乾溝一百十里南至南山北至葦湖西域平後於奇臺設堡乾隆四十一年改設奇臺縣城內有

文廟

關帝廟城西南有奇臺堡二又南有龍口堡渠河出

南山下環抱縣治及諸堡左右稍東有英格布拉克出天山下北流奇臺堡北有奇臺塘

濟爾瑪台

濟爾瑪台在縣治東九十里濟爾瑪台布拉克出天山北流東西各建堡一名西濟爾瑪台堡一

名東濟爾瑪台堡有屯田

見屯政門

木壘

木壘在濟爾瑪台東十里負天山之陰地廣饒水

草宜耕牧東扼巴爾庫勒西通烏魯木齊舊為聲  
援要地乾隆十九年大兵進討準噶爾駐營于此  
有木壘城東距奇臺縣治百里城東南別有舊城  
一雍正年間築東北境有木壘堡一木壘布拉克  
出南山下北流過舊城西又經新城東環堡左右  
其東北境有木壘塘有屯田

見屯  
政門

按後漢書伊吾五百里北通車師前部又五百  
里北通後部金滿城今哈密為漢伊吾闢展為



漢車師前部則後部金滿城當在天山北境唐  
為金滿州又為金滿縣今奇臺縣屬木壘以西  
迄于阜康縣境特納格爾以東正當闢展北境

應皆金滿地也

詳見後阜康  
縣濟木薩條

伊勒巴爾和碩

伊勒巴爾和碩在木壘東北四十里南有泉出北  
山麓有一灣泉塘

阿克塔斯

阿克塔斯在伊勒巴爾和碩東五十里天山北麓  
泉源迭發凡三道相距各十餘里其西南四十里  
有地名烏里雅蘇台

烏蘭烏蘇

烏蘭烏蘇地以水名在阿克塔斯東南九十里舊  
為準噶爾東境乾隆二十年三月大兵進討準噶  
爾甫入境有扎哈沁宰桑敦多克及其德木齊巴  
罕曼濟等來迎將軍薩拉爾等宣示

恩旨數多克等咸感動泣下奏言

大皇帝均憐並覆撫育準噶爾部衆拯諸水火登乎衽  
席再生之德願無二心乃率所屬一千五百餘戶  
內附此諸部落歸誠之始烏蘭烏蘇扎哈沁游牧  
東界也東為庫舍圖又東六十里為庫克車勒有  
泉名諾爾色必特有色必特塘又東六十里至噶  
順溝口接宜禾縣界

格根

格根在奇臺縣治西四十里分中東西三堡相距  
各五里堡各有渠源出天山下北流中格根渠醜  
為三道夾堡而趨東西渠俱流經堡之東境西格  
根之西有泉名碧流溝中格根之北有地窩鋪塘  
吉布庫

吉布庫在格根西二十里有吉布庫堡東西有渠  
發源天山北麓北流夾堡之左右東名永豐溝西  
名永泰溝有屯田

見屯政門

北十里地有獨樹名一顆

樹有一顆樹泉

鏗格爾

鏗格爾在吉布庫西二十里有鏗格爾堡泉出天山北麓北流經堡之東堡西別有泉土名達巴罕溝

古城

古城在奇臺縣治西北九十里由奇臺塘至古城五十里南北二城南城中

萬壽宮

關帝廟城西有牛圈泉乾隆四十年駐防大臣索諾穆策凌於其地得唐時殘碑石二方有金滿縣令等字知古城為唐金滿地也有屯田

見屯政門

唐書地理志北庭都護府縣四金滿輪臺後庭西海金滿州都督府永徽五年以處月部落置為州龍翔二年為府

按唐金滿縣應即漢車師後部金滿城地漢時

由車師前部北通後部金滿城之路當在今阜

康縣東境之濟木薩

詳見後卷

阜康縣東境與奇臺

西境接古城與濟木薩境本相屬當為唐時金  
滿縣東境碑石原建處不必定在縣城也據此  
則今奇臺縣之西境阜康縣之東境均當為金  
滿故地無疑

### 都爾伯勒津

都爾伯勒津在古城東十里有舊城東有舊城屯

泉自都爾伯勒津東北行經額勒蘇廋濟鄂克沁  
托賴庫布烏爾圖布拉克三百里至拜塔克

乾溝

乾溝在古城西六十里西接迪化州屬阜康縣界  
按今鎮西府為唐伊州沙陀近寇伊州當伊州  
北境宜在今鎮西府北唐沙陀州金滿州均以  
處月部置地宜毗接金滿屬漢車師後部為今  
奇臺縣西境阜康縣東境地則沙陀故境又當在



今奇臺阜康兩縣北金滿州既南近天山則沙陀州自北連大磧今自奇臺縣西北境阜康縣東北境之都爾伯勒津迤北一帶戈壁東屈哈布塔克拜塔克疑即沙陀舊壤其方位亦適當伊州之西北金滿州之正北也

以上屬奇臺縣

蘇博阿拉

蘇博阿拉在鎮西府奇臺縣西北境都爾伯勒津

東北二十里又東北行二百餘里至拜塔克舊為  
準噶爾東南界

阿濟

阿濟在鎮西府宜禾縣東北境哈喇和屯北一百  
里西接華烏里雅蘇台

必濟

必濟在鎮西府宜禾縣境外阿濟西北接華烏里  
雅蘇台

華烏里雅蘇台

華烏里雅蘇台在必濟山北西南北三面環山東  
面池泉不一東至烏里雅蘇台軍營五百餘里由  
華烏里雅蘇台北山西北行岡巒層疊千有餘里  
直至古爾畢達巴阿勒坦鄂拉舊為準噶爾東界  
察罕察奇爾圖

察罕察奇爾圖在鎮西府宜禾縣木城北一百八  
十里踰北山而至又西北五十里為夸察奇爾圖

西六十里為哈喇察奇爾圖

阿拉克椿集

阿拉克椿集在鎮西府宜禾縣城東北一百二十里又西北為察罕椿集又西北為額林椿集

奎屯郭勒圖

奎屯郭勒圖在額林椿集西北五十里地饒水草

蘇魯圖

蘇魯圖在奎屯郭勒圖西北五十里又自鎮西府

宜禾縣北境之西里克拜姓北踰哈套鄂拉北行三十里為烏爾圖又北二十里為布渾又北三十里為博羅鄂博又東北五十里亦至蘇魯圖

色爾克

色爾克在蘇魯圖西北八十里又西北為昭達木濟呼又西北至哈布塔克

哈布塔克

互見山

哈布塔克地以山名在鎮西府西北四百里北六

十里即布拉干郭勒河南山北之地饒水草宜畜  
牧踰哈布塔克至青吉勒郭勒舊為準噶爾東南  
界

拜塔克

拜塔克地以山名在哈布塔克西青吉勒郭勒南  
岸由拜塔克西南行三百里至奇臺縣界

謹按我

朝舊疆與準噶爾分界處在阿勒坦鄂拉南古爾畢

達巴至哈布塔克拜塔克之間爰舉必濟以下  
諸境當鎮西府北界者隸諸卷末以表舊疆之  
所屆云

以上屬鎮西府北境外地

欽定皇輿西域圖志卷九



欽定四庫全書

欽定皇輿西域圖志卷十目錄

疆域三

安西北路二

迪化州屬

迪化州治

頭道灣庄

五道灣庄

九道灣庄

卡子灣庄

古木

地窩鋪

土墩子

三個泉庄

倉房溝庄

大西溝

鹽池墩

昌吉縣治

羅克倫

蘆草溝

呼圖克拜

綏來縣治

陽巴勒噶遜

圖古里克

巴克呼蘊

烏蘭烏蘇

和爾郭斯

博羅特克圖魯庫

安濟哈雅

阜康縣治

賽因塔喇

庫里葉圖

納里特

濟木薩

得勒呼蘇台

欽定皇輿西域圖志卷十目錄

欽定四庫全書

欽定皇輿西域圖志卷十

疆域三

安西北路二

迪化州屬 統縣三 昌吉綏來阜康東至木壘烏蘭  
烏蘇阜康縣屬之得勒呼蘇台接鎮西府奇臺縣  
界東南逾山接天山南路開展界西南接伊犁東  
路北通塔爾巴噶台西至綏來縣屬之安濟哈雅

接天山北路庫爾喀喇烏蘇界

迪化州治

迪化州治在烏魯木齊東距鎮西府一千三百八  
十里距京師八千八百九十里居天山之陰地當  
孔道托克喇鄂拉博克達鄂拉環其東烏可克達  
巴哲爾格斯鄂拉拱其南鄂倫淖爾潞其左烏魯  
木齊郭勒經流其南北山環水繞土膏沃衍宜種  
殖舊為準噶爾庫木諾雅特遊牧處亦噶勒丹多



爾濟之昂吉乾隆二十年正月大兵進討準噶爾  
噶勒丹多爾濟率其屬望風降地皆內屬有舊城  
周可三里

賜名迪化別于舊城北建迪化新城門四東曰惠孚西  
曰豐慶南曰肇阜北曰憬諱在阿勒塔齊郭勒東  
支流環抱之內新城內有

萬壽宮城隍廟提督駐此城東有

關帝廟舊城西亦有

關帝廟龍王廟乾隆三十八年改設直隸迪化州于  
迪化城西三十里建鞏寧城門四東曰承曦西曰  
宜穡南曰軌同北曰樞正為知州治城內有

萬壽宮

關帝廟城隍廟雷雨風神廟城東為

文廟城東南為先農壇龍王廟鎮迪道駐此阿勒塔

齊郭勒東西有新舊二屯

見屯政門

共建六堡堡各四

門曰惠徠堡東憬德門西宣威門南迎陽門北拱

化門曰屢豐堡東卷風門西調露門南麗照門北  
正衡門曰宣仁堡東元善門西利和門南依光門  
北奉朔門曰懷義堡東登春門西稔秋門南薰溥  
門北階平門曰樂全堡東引恬門西遂成門南大  
亨門北永貞門曰寶昌堡東延韶門西成泰門南  
章教門北翊辰門州境東西一百四十里東至博  
克達鄂拉東北接阜康縣界西至頭屯河接昌吉  
縣界南北五百里南至根特克接闡展界北至葦

湖

按山北準部為烏孫突厥舊俗逐水草無城郭  
史傳所稱古今不奕後以回部服屬準噶爾間  
有築城山北者而於額魯特穹廬羶帳之舊則  
未之或易自入版圖後

天朝制度維新烏魯木齊為準部東境勝壤始則築  
城建堡屯政軍政以次經理復肇設州縣建置  
學校風教蔚興與內地無異古稱行國不土著

之區幸際昌時俾其俗蒸蒸日上變稱極盛焉其地于漢為蒲類國于唐為北庭大都護府後入吐蕃為考証于後

漢書西域傳蒲類國王治天山西疏榆谷西南至

都護治所

都護治烏壘城今屬哈喇沙爾

千三百八十七里

後漢書西域傳蒲類國東南去長史所居千二百

九十里

長史治柳中今屬闐廞

唐書地理志

北庭大都護府領後庭縣本蒲類隸

西州後來屬寶應元年更有蒲類郝遮鹹泉三鎮特羅堡

元史地理志自上都西北行六千里至回鶻五城唐號北庭置都護府至元五年海都叛世祖逆敗之北庭

按天山自托克喇鄂拉至博克達鄂拉百餘里之間南北綿亘迪化州當其西境漢書西域傳獨於蒲類國曰在天山西者當即今迪化州境

也又傳稱東蒲類王茲力支降都護分車師後王之西為烏貪訾離地以居之是蒲類故地初在東陞既降都護後乃始西遷為蒲類國在天山西也漢書烏貪訾離國蒲類國雖並載而不啻一國在今則為迪化州昌吉縣境特其二國分界處不可考耳唐後庭縣注本蒲類故有蒲類鎮亦以舊國得名其郝遮鹹泉特羅諸鎮堡方隅疆域不可考矣

唐書回鶻傳阿史那賀魯之盜北庭婆閏以騎五萬助契苾何力等破賀魯收北庭安西北庭自天寶末失關隴朝貢道隔伊西北庭節度使李元忠數遣使奉表不至貞元二年假道回鶻乃得至長安帝進元忠為北庭大都護自是道雖通而虜求取無渙沙陀別部六千帳與北庭相依亦厭裒索至三葛祿白眼哭厥素臣回鶻者密附吐蕃故吐蕃因沙陀共寇北庭北庭陷葛祿取深圖川回鶻



大恐稍南其部落以避之吐蕃傳北庭沙陀別部  
叛吐蕃因是陷北庭都護府安西道絕獨西川  
人尚為唐守

按唐貞觀二十三年以阿史那賀魯部落置瑤  
池都督府永徽四年廢顯慶二年擒賀魯分其  
地置都護都督諸府其役屬諸胡皆為州總隸  
北庭都護自今迪化州西抵伊犁皆其境也而  
迪化州屬境為天山北一大都會應為唐時北

庭都護駐防之所爰舉史傳証之其隨地分見  
者析著各條之下復統論北庭大略如此顧唐  
自天寶末貢道中阻厥後北庭陷入吐蕃伊西  
以外均非唐有即初擒賀魯開置北庭之始亦  
不過遙設州府以示羈縻實則戶口不登貢賦  
不入曾不再傳俱歸淪棄是則天山迤北從古  
未隸中國輿圖信有徵矣非我

皇朝德威遐奄什百曩古曷由胥化外而疆索之哉

頭道灣庄

頭道灣庄在州治北二十五里阿勒塔齊郭勒北  
行分流處東有二道灣三道灣四道灣庄

五道灣庄

五道灣庄在州治東北二十五里踰阿勒塔齊郭  
勒至其地在屢豐堡東又東有六道灣七道灣八  
道灣庄

九道灣庄

九道灣庄在五道灣東八里踰河至其地又東有  
熱水泉

按自頭道灣庄至此凡九庄茲舉居民殷庶者  
著為綱餘從附叙云

卡子灣庄

卡子灣庄在五道灣北十里自五道灣至此博克  
達鄂拉峙其東南山麓流泉環帶庄戶鱗比致為  
勝秀

古木

古木在州治東北四十里乾隆二十七年于其地  
建輯懷城門四東曰承恩西曰敷信南曰暘若北  
曰星從城北有輯懷城塘

地窩鋪

地窩鋪在州治西三十里當鞏寧城北踰烏魯木  
齊支河至其地有地窩鋪塘

土墩子

土墩子在地窩鋪西三十里東距州治六十里當鞏寧城西北踰烏魯木齊支河至其地有土墩子

塘

三個泉庄

三個泉庄在鞏寧城西北三十里東距州治七十里其南二十里為西三個泉泉皆匯流入烏魯木

齊郭勒

倉房溝庄

倉房溝庄在西三個泉庄南二十里

大西溝

大西溝在鞏寧城東南三十里東北距州治二十里當烏魯木齊郭勒發源處水泉饒沃居民櫛比東踰烏魯木齊郭勒十里有小河出南山麓北流居民依之稱南山戶庄

鹽池墩

鹽池墩在州治南五十里阿勒塔齊郭勒流其東

有鹽池墩塘又東南行踰阿勒塔齊郭勒循南山麓稱達巴根戶庄又東南為多倫達巴又東南行出山接闕展界

以上屬迪化州本境

昌吉縣治

昌吉縣治舊地名昌吉在迪化州西東距州治一百二十里昌吉郭勒經流其地乾隆二十七年於昌吉郭勒西建寧邊城門四東曰文同西曰武定



南曰諧通北曰熨遐乾隆三十八年設縣隸迪化州縣治東有

丈廟八蜡廟火神廟城北有

關帝廟東北有先農壇昌吉郭勒東西有三屯

見屯政門

縣境東西二百里東至頭屯河接迪化州界西至呼圖克拜郭勒接綏來縣界南至天山北至葦湖羅克倫

羅克倫在縣治西二十里昌吉羅克倫舊為噶

勒丹多爾濟遊牧之所乾隆二十年三月大兵進  
討準噶爾噶勒丹多爾濟偕其兄子扎納噶爾布  
以二千五百餘戶降二十一年十一月扎納噶爾  
布叛二十二年二月殺噶勒丹多爾濟於安濟哈  
雅扎納噶爾布旋為布爾古特台吉渾齊等擒斬  
以獻所部乃平

漢書西域傳蒲類後國王去長安八千六百三十  
里

按漢書西域傳載蒲類前國去長安八千三百六十里後國去長安八千六百三十里則後國當居前國之西北境今昌吉縣東南與迪化州接壤迪化州為蒲類前國則昌吉為蒲類後國可知也又按羅克倫與樓蘭字音相近疑即其國故地然考樓蘭漢元鳳四年改名鄯善後漢書稱自敦煌出玉門關涉鄯善玉門關在今安西州敦煌縣西以方位道里考之樓蘭故地當

在今敦煌縣西境外之色爾騰海今之羅克倫  
在天山北與敦煌西境之色爾騰海南北相去  
千餘里似非樓蘭故地或當時樓蘭人曾徙居  
山北即名其地為樓蘭後遂訛為羅克倫未可  
知耳

蘆草溝

蘆草溝在羅克倫西五十里東距昌吉縣治七十  
里東為小蘆草溝設有大小蘆草溝塘

呼圖克拜

呼圖克拜

舊對音  
呼圖壁

在蘆草溝西二十里東距昌吉

縣治九十里乾隆二十九年建景化城門四東曰  
熙景西曰寶成南曰阜薰北曰溥信呼圖克拜郭  
勒出天山北麓北流經其東

以上屬昌吉縣

綏來縣治

綏來縣治舊地名瑪納斯在昌吉縣西北東南距

昌吉縣治二百二十里距迪化州治三百四十里

瑪納斯郭勒環其西塔什郭勒

一名哈齊克郭勒

經其東

俱從天山北麓發源北流百餘里左右迴抱地勢

寬平水泉饒裕亦古都會也舊為準噶爾呼拉瑪

部游牧地納木奇之昂吉乾隆二十八年入版圖

後建綏來堡門三曰即叙曰迪康曰覃化四十二

年建左右二城左為綏寧城門四東曰迎義西曰

兆成南曰來薰北曰寧漠右為康吉城門四東曰

延旭西曰慶豐南曰麗端北曰鞏遐兩城南北相倚西面設關曰靖遠關門之內

關帝廟城隍廟在焉四十四年設綏來縣隸迪化州縣境東西一百二十里東至圖古里克接昌吉縣界西南至安濟哈雅接庫爾喀喇烏蘇界南至天山北至葦湖縣治東二十里有塔什河塘

漢書西域傳宣帝初即位公主及昆彌皆遣使上書言匈奴復連發大兵侵擊烏孫取車延惡師地

收人民去使使謂烏孫趣持公主來欲隔絕漢

後漢書西域傳移支國居蒲類地其人勇猛敢戰

以冠鈔為事皆被髮隨畜逐水草不知田作

唐書突厥傳西突厥由焉耆北八日行得北庭乙

毗鉢羅肆葉護可汗忌泥孰泥孰亡焉耆後肆

葉護可汗走康居國人迎泥孰於焉耆立之是為

咄陸可汗賀魯取咄陸可汗故地及敗裂其地為

州縣以處諸部胡祿屋闕部為鹽泊都督府隸安



西都護府地理志鹽泊都督府以胡祿屋闕部置  
隸北庭都護府

按酈道元水經注焉耆之北敦薨之山在匈奴  
之西烏孫之東是匈奴烏孫交界處在焉耆之  
北今自山南哈喇沙爾北踰天山是其地也今  
之迪化州昌吉縣為漢時蒲類前後國

說見其  
本卷

直北當屬匈奴西境由是以西為烏孫東境南  
與焉耆相直如今伊犁東南路即漢時烏孫國

之東境也後漢書移支國居蒲類地應在今昌吉縣西與今綏來縣全境方位相合應屬後漢移支國地陽巴勒噶遜南去哈喇沙爾五百里以唐書由焉耆北八日行為西突厥北庭之文証之則此當屬唐時西突厥北庭惟其境在焉耆正北本相近附是以泥孰七人焉耆國人迎而立之也再考當時五咄陸部俱屬西突厥東境而葛邏祿胡屋

即胡祿屋闕

鼠尼施三姓於聖厯

四年內屬境地毗連以今地位考之葛邏祿居  
北當在塔爾巴噶台納林和博克一帶與處木  
昆部雜居鼠尼施為處半部在裕勒都斯一帶  
更以博羅塔拉左右之為攝舍提曠部伊犁左  
右之為突騎施索葛莫賀部伊犁以西之為突  
騎施阿利施部推之

說並見二十三卷及本卷各條下則所謂

胡祿屋闕部者應在今額彬格遜淖爾南境  
左右諸河環抱之間與今綏來縣全境形勢適

符而唐得之以為鹽泊都督府者也惟地理志  
鹽泊都督府隸北庭都護突厥傳隸安西都護  
說不相同然考當時北庭大都護府統縣四金  
滿輪臺後庭西海輪臺在龜茲東西海應即西  
突厥傳所謂雷鰲海是北庭所轄之境甚廣且  
據地理志十姓部落皆隸北庭惟四鎮都督府  
州三十四河西內屬諸胡州十二府二西域府  
十六州七十二則隸安西都護府兩都護府境

地多寡適中如突厥傳所云則十姓部落亦  
隸安西其北庭所轄不應太小且安得輪臺  
西海而縣之邪此當以地理志之說為正也

陽巴勒噶遜

陽巴勒噶遜在縣治東三十里舊說以為古陽關

者非是

說詳疆域一  
敦煌縣條

圖古里克

圖古里克在陽巴勒噶遜東五十里西北距綏

來縣治八十里圖古里克郭勒出天山北麓北流  
經其地有圖古里克塘

巴克呼蘇

巴克呼蘇在綏來縣治西四十里南距哈屯博克  
達鄂拉一百里當孔道設有破城子塘

按唐書突厥傳由焉耆北八日行得西突厥北  
庭與處月處密諸種雜處月即漢車師後城金  
滿地處密應其西入吐陸以處月處密兵圍天

山而不克孝恪追北抵遏索山斬十餘級降處  
密部而歸遏索山應即今哈屯博克達鄂拉處  
密部應在其北疑與今之巴克呼蘇相近

烏蘭烏蘇

烏蘭烏蘇在巴克呼蘇西四十里

和爾郭斯

和爾郭斯舊對音為和落霍漸在烏蘭烏蘇西十  
里東距綏來縣治八十里地有和爾郭斯郭勒乾

隆二十三年正月起勇郡王將軍策布登扎布以  
四百人追準噶爾從賊布庫察漢哈薩克沙喇等  
至此賊衆千餘以輜重先行賊據險設伏我兵至  
賊蜂聚鎗礮四集策布登扎布奮勇突圍擒其率  
衆渥赭特殲衆四百我軍無一傷者賊乃潰散

御製和落霍漸行

戊寅

今春我師勦逆夷首戰實和落霍漸斬將奪旗早報捷  
酬勞頒賚已有差即今生解俘囚至日渥赭特率衆伊



散秩大臣曾授職乃敢倡亂如鴉鵂面詢彼所致敗故  
咋舌惟嘆天奪其彼衆猶有千餘騎覘知我寡設計奇  
輜重遠行誘我逐層層伏賊據險巖官兵四百始馳至  
少騎示弱山之陞我進彼乃遙甬集銳礮如雨循環施  
我軍曾無一傷者百靈擁護信有之衝鋒突入矢齊發  
賊乃喪膽紛離披鹿埵隴種各逃兵大譟大膊張軍威  
殲彼屍僵近四百負傷遁者數無訾是誠

天助額手慶奮勇要亦資人為問率軍者其人誰起勇親

王家聲貽

將軍策布登扎市為起勇親王額駙策楞之子其兄成家扎市襲封親王策布登扎市以

奮勇著績爵封郡

王亦賜號起勇

### 博羅特克圖魯庫

博羅特克圖魯庫在巴克呼蘇西二十里東距綏

來縣治一百里和爾郭斯郭勒西

### 安濟哈雅

安濟哈雅在博羅特克圖魯庫西南五十里東距

綏來縣治一百五十里南北有山安濟哈雅郭勒

經流其地形勢險嚴饒水草宜耕牧舊準噶爾  
部噶勒丹多爾濟之姪扎納噶爾布游牧於此乾隆二十二年四月呢嗎與噶勒丹多爾濟不協說  
扎納噶爾布殺之及所屬舊宰桑等據其餘衆與  
呢嗎扎哈沁為一欲據準噶爾為台吉乃自安濟  
哈雅移博羅塔拉而去後為布爾古特台吉渾齊  
等擒殺其部悉定東為巴哈安濟哈雅西為伊克  
安濟哈雅西接庫爾喀喇烏蘇界

以上屬綏來縣

阜康縣治

阜康縣治舊地名特訥格爾在迪化州治東北二  
百里舊為準噶爾圖爾古特部游牧處入版圖後  
建阜康堡門四東曰綏惠西曰振武南曰麗陽北  
曰寧朔乾隆四十一年設阜康縣隸迪化州縣境  
東西三百十里東至得勒呼蘇台接鎮西府奇臺  
縣界西至甘泉鋪接迪化州界南至天山北至鞏

湖

漢書西域傳烏貪訾離國王治于婁谷東與單桓南與且彌西與烏孫接

按漢且彌國在天山南金嶺北為山北六國之一烏貪訾離南與且彌國接可知其國在博克達鄂拉之北與今阜康縣治之特訥格爾方位相合應即其地又烏貪訾離與烏魯木齊字音相近特訥格爾與烏魯木齊境界毗接在漢時

當是一國地故其名雖變而不相離也又漢書  
稱烏貪訾離為車師後王西境分國是其東境  
應與車師後國接今阜康縣屬東境當屬車師

後王國地

詳見後濟  
木薩條

賽因塔喇

賽因塔喇在阜康縣治東六十里南距博克達鄂  
拉八十里平原沃壤廣饒水草宜耕牧又東三十  
里為滋泥泉塘

漢書西域傳單桓國治單桓城去長安八千八百七十里

按漢烏貪訾離國東與單桓接今阜康縣治為烏貪訾離地賽因塔喇居其東境應即單桓國地漢書西域傳稱單桓戶止二十七其國甚小略如今縣屬之一塘耳

庫里葉圖

庫里葉圖在賽因塔喇東六十里西距阜康縣治

一百二十里

納里特

納里特在庫里葉圖東二十里西距阜康縣治一百四十里又東十里為三台塘

濟木薩

濟木薩在三台塘東七十里西距阜康縣治二百三十里舊城一乾隆三十七年增築

賜名愷安門三東曰麗旭西曰同風南曰覃惠又新建



保惠城門三東曰舒景西曰阜登南曰萃昌舊城  
西五里為柳樹溝建堡一曰時和門三東曰皦平  
西曰肅正南曰麗照又西二十五里為雙岔河建  
堡一曰育昌門三東曰廣生西曰徠極南曰兆嘉  
俱有屯田見屯政門濟木薩東北四十里為伯什特勒  
克有舊城

漢書西域傳車師後王姑句與匈奴南將軍地接

普

戊巳校尉徐普

欲分明其界召姑句使證之不肯擊之

姑句馳突出高昌壁入匈奴單于執送因請其罪  
不聽斬姑句建國二年車師後王須置離欲亡入  
匈奴戊己校尉刁護聞之驗問詞服都護但欽斬  
置離兄輔國侯狐蘭支將置離衆二千餘人驅畜  
產舉國亡降匈奴

後漢書西域傳置戊部候居車師後部候城相去  
五百里又自高昌壁北通後部金滿城五百里後  
王居塗務谷去長史所居五百里去洛陽九千六

百二十里北與匈奴接後部西通烏孫建武二十  
一年遣子入侍光武遣還之乃附屬匈奴永元八  
年戊己校尉索願欲廢後部王涿鞮涿鞮反擊前  
王尉卑明年漢討涿鞮入北匈奴追斬之立涿鞮  
弟農奇為王永寧元年後王軍就及母沙麻叛殺  
部司馬延光四年長史班勇擊斬之永建元年勇  
率農奇子加特奴擊呼衍王破之立為後王陽嘉  
四年呼衍王侵後部救之永興元年車師後部王

金史紀事本末 卷十  
阿羅多亡走北匈奴中立後部故王軍就質子卑  
君為後部王後阿羅多還與卑君爭國戊校尉閭  
詳許復為王乃詣詳降於是收奪所賜卑君印綬  
更立阿羅多為王

魏畧西戎傳 北新道西行東至且彌國西且彌國  
單桓國畢陸國蒲陸國烏貪國皆并屬車師後  
部王治于賴城魏賜其王號大都尉受魏王印

唐書西域傳 高昌王文泰與西突厥通以金厚餉

西突厥欲谷設約有急為表裏使葉護屯可汗浮  
圖城地理志北庭大都護府本廷州貞觀十四年  
平高昌以西突厥泥伏沙鉢羅葉護阿史那賀魯  
部落置長安二年為北庭都護府縣四金滿輪  
臺後庭西海

按漢車師後國南與車師前國接班書謂之後  
國范書謂之後部今天山南開展屬為車師前  
部地

詳見天山南路

自濟木薩南踰天山通闐展所屬

之交河即漢書由前部高昌壁通後部金滿城之路是車師後王國在今阜康縣境內而所謂金滿城者與今濟木薩為近似矣闕展北倚天山踰山為唐西突厥地葉護屯可汗浮圖城與高昌相影響其地必與高昌北境相屬故得藉此以為聲援今濟木薩與東北境之伯什特勒克皆有舊城而自濟木薩南踰天山通闕展即高昌地疑漢時金滿城唐時浮圖城故址于是

乎在也處月內屬即其地置金滿沙陀二州金  
滿居西即漢金滿城舊地又為金滿縣隸北庾  
都護府皆以漢城得名又考漢書匈奴東蒲類  
王降都護分車師後王之西為烏貪訾離地以  
處之烏貪訾離南與且彌接為今之特訥格爾  
即阜康縣治則特訥格爾以東應屬車師後王  
地魚豢魏畧載車師後部王治于賴城與漢書  
所載烏貪訾離國治于婁谷者境本毗連音亦


相近疑于賴城即在于婁谷畢陸即漢卑陸字  
之訛也至漢前國後國即唐前庭後庭名號相  
沿大畧可証然唐時北庭四縣疆域甚廣應不  
止車師後王之地以地理志考之後庭縣注云  
本蒲類是兼有蒲類國也輪臺縣本漢輪臺地  
是兼有焉耆國也惟金滿縣即金滿城為漢車  
師後國之地是不得謂唐之後庭即漢之後國  
者要不得謂漢之後國非唐之北庭矣



得勒呼蘇台

得勒呼蘇台在伯什特勒克城南五十里其西二十里為伊克呼蘇台又東接奇臺縣界

以上屬阜康縣



欽定皇輿西域圖志卷十